

ХӨДЛӨХ БҮРЭЛДЭХҮҮН ЖОЛООДОХ ЭРХ ОЛГОХ ЖУРАМ

Нэг. Нийтлэг үндэслэл

1.1. Хөдлөх бүрэлдэхүүн жолоодох эрх олгох шалгалт цаашид “шалгалт” гэх өгөх болзол, шалгалт зохион байгуулахтай холбогдсон харилцааг хуульд өөрөөр заагаагүй бол энэхүү журмаар зохицуулна.

1.2. Шалгалтын зорилго нь Монгол Улсын ачаа тээврийн хэмжээг нэмэгдүүлэх түүнд шаардлагатай машинч нарыг бэлтгэх сонгон шалгаруулж, зүтгүүр жолоодох машинчийн нөөц бүрдүүлэхэд оршино.

1.3. Зүтгүүрийн жолоодох эрх олгох шалгалтыг төмөр замын асуудал эрхэлсэн Төрийн захиргааны байгууллагын дэргэдэх орон тооны бус “Төмөр замын дэд салбар зөвлөл” (цаашид “Төмөр замын дэд салбар зөвлөл” гэх)-өөс улирал тутам зохион байгуулж, хөдлөх бүрэлдэхүүн жолоодох эрхийн үнэмлэх олгоно.

Хоёр. Шалгалтын тов

2.1 Төмөр замын дэд салбар зөвлөлөөс шалгалтын тов болон холбогдох мэдээллийг шалгалт эхлэхээс 30-аас доошгүй хоногийн өмнө Төрийн захиргааны байгууллагын цахим хуудсаар дамжуулан нийтэд мэдээлнэ.

2.2 Зайлшгүй шаардлагаар шалгалтын тов болон мэдээлэлд өөрчлөлт оруулах бол энэ тухай нийтэд мэдээлнэ.

Гурав. Шалгалтын зохион байгуулалт

3.1 Төрийн захиргааны байгууллагаас шалгалт зохион байгуулах үүрэг бүхий Төмөр замын дэд салбар зөвлөлийг 5-7 хүний бүрэлдэхүүнтэйгээр байгуулна.

3.2 Төмөр замын дэд салбар зөвлөл нь дараах чиг үүргийг хэрэгжүүлнэ.

3.2.1 Шалгалтын үйл ажиллагааг мэргэшил, арга зүйн удирдлагаар хангах, журмын хэрэгжилтэд хяналт тавих.

3.2.2 Шалгалттай холбоотой санал, гомдлыг хүлээн авч зохих журмын дагуу шийдвэрлэх.

3.2.3 Шалгалтад тэнцсэн иргэнийг Төрийн захиргааны байгууллагад мэдэгдэж Хөдлөх бүрэлдэхүүн жолоодох эрхийн үнэмлэх олгуулах.

3.2.4 Шалгалт авах танхим, техник хэрэгсэл, сүлжээ холбогдох бэлтгэлийг хангах, зохион байгуулах.

3.2.5 Шалгалтын тайлан, холбогдох материалыг Төрийн захиргааны төв байгууллагад хүргүүлэх.

Дөрөв. Шалгалт өгөх болзол

4.1 Техникийн, мэргэжлийн болон дээд боловсролын дипломын хуулбар хувь;

4.2 Туслах машинчаар аялсан километр, ажилласан жилийн тодорхойлолт;

4.3 Машинчийн мэргэжлийн ажилд эрүүл мэндээр тэнцэх тухай эрүүл мэндийн үзлэг хийсэн актын хуулбар;

4.4 Шалгалтын үйлчилгээний зардал төлсөн баримт.

Тав. Шалгалтын үйл ажиллагаа

5.1 Шалгалтад бүртгүүлсэн иргэдийн тоо, танхимийн багтаамж, тоног төхөөрөмжийн хүрэлцээ зэргээс шалтгаалан шалгалтыг хэсэгчлэн зохион байгуулж болно.

5.2 Хөдлөх бүрэлдэхүүн жолоодох эрх горилогчид иргэний үнэмлэхээ шалгуулж шалгалтад орно.

5.3 Шалгалтад орох иргэдийг 15 минутын өмнө танхимд оруулж, суудал эзлүүлсэн байна.

5.4 Шалгалт 90 минут үргэлжлэх бөгөөд цахим хэлбэрээр зохион байгуулна.

Зургаа. Шалгалтын бүрэлдэхүүн, агуулга, хэлбэр

6.1 Зүтгүүрийн туслах машинч нараас хөдлөх бүрэлдэхүүн жолоодох эрхийн үнэмлэх олгох онолын шалгалтыг дор дурдсан сэдвээр өгөх ба нийт 100 асуултын 80 буюу түүнээс дээш хувийн дүн авсан тохиолдолд зүтгүүр жолоодох эрхийн үнэмлэх авах эрх үүснэ.

6.1.1 Төмөр замын техник ашиглалтын дүрэм, Галт тэрэгний хөдөлгөөний удирдлагын журам, Төмөр замын дохиолол, холбооны журам, хөдөлгөөний ажилд холбогдсон заавар тушаал, журмууд;

6.1.2 Тухайн байгууллагын суурь бүтэц дээр ашиглагдаж байгаа бүх серийн зүтгүүрийн хийц, бүтэц, зохион байгуулалт, ашиглалтын болон автомат тоормос ашиглах заавар;

6.1.3 Зүтгүүрийн хугацаат үечилсэн засварын дүрэм, замд тохиолдож болох гэмтэл илрүүлэн засварлах, гэмтлээс урьдчилан сэргийлэх арга барил;

6.1.4 Дизелийн түлш, түүний үндсэн үзүүлэлт, ашиглаж зарцуулах, арчих тослох материалын тухай хэмнэх арга барил;

6.1.5 Хөдөлмөрийн эрүүл мэнд аюулгүй байдал, Галт тэрэгний хөдөлгөөний аюулгүй байдал;

6.1.6 Зүтгүүрийн бригадын ажил амралтын дэглэм, албан үүргийн заавар;

6.1.7 Галт тэрэгний хөдөлгөөнтэй шууд холбоотой ажилтны хөдөлмөр эрхлэлтийн харилцаа, нөхцөл, сахилгын тусгай журам, байгууллагын дотоод журам;

Долоо. Хариуцлага

7.1 Шалгалтад оролцогчийг дараах тохиолдолд танхимаас гаргана.

7.1.1 Бусдад болон шалгалтын үйл ажиллагаанд саад учруулсан.

7.1.2 Шалгалтын явцад бусадтай дохио зангаагаар харилцсан, ярилцсан, зөвшөөрөлгүйгээр суудлаа орхисон.

7.1.3 Шалгалтын үйл ажиллагаанд саад болох, нөлөөлөх зүйлсийг шалгалтын танхимд авч орсон.

Найм. Бусад

8.1 Зүтгүүр жолоодох эрх олгож буй үнэмлэх нь зөвхөн тухайн төмөр замын байгууллагын суурь бүтэц дээр ашиглагдаж буй бүх серийн илчит тэргийг жолоодоход хүчинтэй байна.

8.2 Зүтгүүр жолоодох эрх горилож буй туслах машинчийг тухайн төмөр замын байгууллага өөрийн дотоод дүрэм, журмын хүрээнд холбогдох сургалтанд хамрагдаж, шаардлага хангаж буй иргэдээс сонгон шалгаруулж, Төрийн захиргааны төв байгууллагад нэрсийг ирүүлнэ.

8.3 Зүтгүүрийн машинчаар ажиллах сонирхолтой, техникийн болон мэргэжлийн боловсрол эзэмшсэн, иргэдээс ерөнхий мэдлэгийн шалгалт авч, тэнцсэн тохиолдолд зүтгүүр жолоодох эрхийн үнэмлэх олгоно.

8.4 Төмөр замын дэд салбар зөвлөлөөс олгосон зүтгүүр жолоодох эрхийн үнэмлэх нь зөвхөн тухайн төмөр замын байгууллагын суурь бүтэц дээр хүчинтэй байна.

8.5 Тухайн байгууллагын зүтгүүр жолоодох эрх авсан этгээд бусад төмөр замын байгууллагад шилжин шинэ маягийн зүтгүүр жолоодох тохиолдолд дахин шалгалт өгч, зүтгүүр жолоодох эрхийн үнэмлэх авна.

8.6 Зүтгүүр жолоодох эрхийн үнэмлэхийг 3 жилийн хугацаатайгаар олгоно.

8.7 Тухайн төмөр замын байгууллагын зүтгүүрийн паркийн 50-аас дээш хувьд өөрчлөлт орж, шинэ серийн илчит тэрэг ашиглах тохиолдолд тухайн төмөр замын байгууллагын зүтгүүр жолоодох эрх авсан машинч нар дахин шалгалтанд хамрагдана.